

文苑英華卷第六百四十一

狀十四

進貢中

降誕日進物狀十五首

進農書狀一首

進碑文狀二首

進詩狀一首



進新舊文十卷狀一首

進畫馬屏風狀一首

進東封圖狀一首

進西北邊圖經狀一首

進哀冊文狀二首

降誕日進光明砂等狀二首

呂頌

右臣伏以大電遶樞千年感聖神光照室六合歸尊恭惟  
降誕之辰是啓乾坤之祚普天稱慶率土同歡仰舜日而  
徘徊望堯雲而抃躍前件光明砂等金冊上品著在仙經

願因一作延不朽之姿求固長生之壽

二

右臣伏以上玄降聖之時皇帝出震之日天垂景曜遶北斗以呈祥人竭歡心願南山而為壽前件光明砂丹石等管内所出服餌所尚生依山谷誠有驗於仙方貢自蠻夷幸得充於御府臣藩守有限不獲稱慶闕庭

降誕日進物狀

裴次元

右臣伏以搖光之祥貫月於佳夕遶樞之感降聖於良辰歡浹寰瀛慶延寶祚百靈効祉固增壽於南山萬國一心皆貢珍於北闕臣謬膺庶問分鎮甌閩當朝采之稱觴身居遐遠望長安而瞻日戀積心魂前件女口及銀器衣箱

等稽禹貢之文敢遵任土比野芥疑作片之獻空願竭心

因此而展誠豈以菲而廢禮輕瀆旒袞殞越伏深

降誕日進馬及織成紅綿地衣狀 于邵

右臣伏以今月十九日陛下降誕之辰萬國駿奔二儀交

泰玉帛方陳於闕下慶抃實匝於寰中臣謬荷殊恩思登

壽域伏以馬則雄姿未織此句疑誠謝於權奇織成乃異於

案箱宜或存於煥爛懿茲致遠之用宜秉含章之資憑物

遵疑誠感恩祝聖所獻雖慙於萬國均情實邁於等夷臣

不勝懇悃之至

為京兆李尹降誕日進衣狀 劉禹錫

衣一副四事 云右伏以德水方清真龍下降天長地久

瞻北極而常尊獻壽稱觴配南山之集作末固臣地叨集

居宗屬職忝尹京慶賀之誠倍萬常品前件衣服謹詣銀

臺門奉進輕瀆旒宸伏用兢惕集作

降誕日進銀器物及零陵香等狀 令狐楚

右伏以千年元命之符四月正陽之氣出震吉日繼乾良

辰黃河再清冠中古之表德恒星不見掩西方之誕聖前

件器物或堅白無玷或馨香有聞敢同率土之心以續如

天之壽干冒宸宸伏增戰越

降誕日進鞍馬等狀四首 前人

右臣伏以統樞之電曾委瑞於軒皇照室之光昔呈祥於

漢后伏惟皇帝陛下貴從天下明在日中當四月之正陽

垂千年之聖運人神叶慶朝野同歡臣任重戎旃路遙天

闕懽呼萬歲如聞山嶽之聲傾竭一心庶均葵藿之志前

件馬等誠非珍異頗似柔馴干冒宸嚴伏增戰越

二

右伏以月惟首夏氣叶正陽一人慶誕之辰萬國樂康之

日臣某屬連枝葉守在邊陲觀河水之既清知冬松之盛

一作益茂前件馬弁鞍轡等安其馴教考以精誠敢緣九族

之恩願續萬年之壽干冒宸宸無任戰越

三

右臣伏以大電統樞之辰普天咸慶神光照室之夜匝地

同歡臣限守邊陲未朝雲闕尚想河清之色如聞里社之

聲前件馬鞍等文似柔馴皆經考教任土作貢慙述職於  
微臣如日之昇願並明於聖主干冒陳獻伏增戰越

四

右臣伏以里社既鳴斗樞爰電誕生元聖允叶純陽實萬  
國同歡之時而千齡兆慶之日臣某限從邊後遠奉天慈  
飲河每挹於清瀾向闕遙瞻於紫氣前件鞍馬等駿非金  
骨麗之錦韉慙無照地之光願獻呼嵩一作之壽干冒陳  
獻伏增戰越

降誕日爲楊大夫奏修功德并進馬狀 前人

右臣伏以居至道之尊其唯元命助無疆之祚亦在勝因  
是以千年爲慶誕之期百福有莊嚴之義伏惟皇帝陛下  
以文武道爲天人師降生於純陽之月續承于大寶之位  
効祉而四天奔走流權而萬國謳歌臣某職在監司土無  
珍異恨無以拜上玄之慶酬厚載之仁敢伏普通轉修經  
戒仰申誠懇以就有爲之功上爲聖神庶資無量之壽其  
馬久令教習頗似柔馴願承內廐之恩以備屬車之駕干  
冒塵瀆不任戰汗之至

降誕日進器物狀四首

王仲周

右伏以執氣牧人運歸聖德天臨日照慶集嘉辰瞻太極  
之肇分仰濛汜之初浴歡忻感戴踴躍屏營臣限守方隅  
不獲稱賀上件銀器等隨伏奉進

二

右伏以紫氣充庭黃河變色用符昌運式表誕彌雖聖壽  
齊天不假封人之祝而獻芹爲禮空馳野老之誠上件銀  
器綿錦綾綺等謹遣某官隨狀奉送

三

右伏以厥日誕祥惟天降聖歡連率土慶集茲辰前件器  
物雖竭愚誠欲申上獻顧惟簡薄難備下陳伏以陛下勤  
恤爲心慈儉成德是用恭行聖旨爲禮不寶遠物爲珍臣  
限以跼守遐藩不獲申慶天闕竊同織草長傾向日之誠  
願比封人遠獻如山之壽無任戀慕歡躍之至

四

右伏以四月孟夏千年聖期社鳴表祥河清叶慶臣於是  
日限守列藩不獲望南山以獻觴聞擊石以率舞屏營戀  
慕不知所裁上件品物等謹遣某官隨狀奉獻

進農書狀

柳宗元

農書三卷

右伏奉某月日制

集作勅

宜以二月一日爲中和

節所司進農書永爲恒式者臣伏以平秩東作虞書立制  
倣載南畝周雅垂文此皆奉天時以授人盡地利而豐食  
自陛下惟新令節益勵農功旣立典於可傳每陳書而作  
則耕鑿之力敷帝力於嘉謨稼穡之艱動天心於睿覽集作  
鑿勤勞率下超邁古先凡在率土不勝幸甚前件農書謹  
函封進謹奏

進田弘正碑文狀

元稹

田弘正魏博德政碑文右前件碑文伏蒙御札朱書遣臣撰述恩生望外事出宸衷銘鏤骨肌難酬雨露

臣伏以陛下所以令臣與弘正立碑蓋欲造魏博及鎮州將吏等並知弘正首懷忠義以致功勳臣若苟務文章廣徵經典非惟將吏不會亦恐弘正未詳雖臨四達之衢難掩萬人之口臣所以効馬遷史體叙事直書約李斯碑文勒銘稱制使弘正見銘而戒逸將吏觀叙而愛心不隱實功不為溢美文雖朴野事頗彰明伏乞天慈特留宸鑒其碑文謹隨狀封進謹具奏聞伏聽勅旨

進幽州紀聖功碑文狀

李德裕

奉宣令臣撰述者伏以北狄悍勇於四夷前代聖王莫能

制伏昨者迴鶻雖乘危蹙勢已內侵豺狼之師尚餘十萬陛下神武雄斷智出無方震天威以霆聲碎獯戎而虜解武功盛烈高視百王豈比周穆犬戎之征荒服不至漢武馬邑之詐群帥無功將垂耿光宜命鴻筆臣學慚集作荒淺久病衰羸集作殘紀軒后之功徒知竭思叙唐堯之德終愧難名採其功狀稍似撫實今已撰訖謹連進上輕瀆宸嚴集作不任惶越謹錄奏聞

進詩狀

元稹

臣某雜詩十卷右臣面奉聖旨令臣寫錄。雜詩進來者伏惟皇帝陛下學深江海文動星辰乙夜觀書秋風賦詠微臣入院之始學士等盛傳陛下親批賀雨一章體備鸞鳳

思深集作珠玉臣雖不得目覩宸翰臣實竊得心念聖言  
既仰燭龍之光難逞聚螢之照欲為陳獻益自慚惶况臣  
九歲學詩少經貧賤十年謫官備極恓惶凡所為文多因  
感激故自古風詩至今樂府稍存寄興頗近謳謠雖無作  
者或風粗中適人之採自律詩一百韻至於兩韻七言或  
因朋友戲投或因悲歡集作或自遣既無六義皆出一時  
詞旨繁蕪倍增慚恐今謹隨狀陳進集作無任戰汗屏營  
之至

進新舊文十卷狀

李德裕

四月二十三日奉宣令臣進來者伏以楊雄云童子雕蟲  
篆刻壯夫不為臣往在弱齡即好詞賦情性集作所作囊

老不忘屬吏職歲深文業多廢意之所感時乃成章豈謂  
擊壤庸音謬入帝堯之聽巴渝末曲復蒙漢祖之知跼蹐  
慙惶神魂飛越謹錄新舊文十卷進上輕瀆宸嚴無任兢  
惕

代李尚書進畫馬屏風狀

李翔集無

右臣近得前件馬樣以其圖寫諸家稍殊試為短屏備以  
文彩觀其體閑色浮氣逸神駿練影吳浦指山川而不搖  
花攢上林若雨露之新洗或屈膝千里或長鳴九霄昔以  
負圖為寶今願捍蔽成功形影不殊効用何別謹裁成十  
二扇隨狀奉進若以時從啓閉猶足靖於埃塵儻將用以  
驅馳庶可效其筋力輒敢輕冒戰懼伏深

爲裴相公進東封圖狀

劉禹錫 見集本

集賢殿御書院開元東封圖一面右臣謹按開元十三年  
玄宗皇帝以天下太平登封東岳聲名文物振耀古今伏  
惟陛下丕承耿光再闡鴻業祖宗盛事紹復有期臣所以  
寫成此圖輒敢上獻至於繪畫躬自指搗徵史氏之文纂  
禮容之要山川氣象悉擬真形羽衛威儀咸稽故實所冀  
睿情一覽遐想玄蹤臣叨榮過深抱疾已久望陛下告成  
之日心必前知嗟老臣將謝之年身恐不見疲羸之際感  
激倍深前件圖差某官乙謹詣光順門奉進謹奏

進西北邊圖經狀

元稹

京西京北圖經四卷右臣今月二日進京西北圖一面山  
川險易細大無遺猶慮幅尺高低閱覽有煩於睿鑒登覽  
施設俯仰頗勞於聖躬尋於古今圖籍之中纂撰京西京  
北圖經共成四卷所冀祗席之上欹枕而郡邑可觀遊幸  
之時倚馬而山川盡在又太和公主下嫁伏恐聖慮念其  
道遠臣今具錄天德城已北至迴鶻衙帳已來食宿井泉  
附於圖經之內并別寫一本與圖經序謹同封進其圖四  
卷隨狀進呈

進憲宗哀冊文狀

令狐楚

右奉勅令臣撰者臣今撰了謹連如後竊以揚先帝無疆  
之德薦陛下罔極之恩宜擇能者永垂不朽聖意以臣備  
位相府策名文場忘其庸虛賜以撰述頃自哀迷重疊心



緒摧落雖磨鉛雕朽已竭其精誠捧日窺天難窮其高遠  
干冒封進無任悲躍屏營之至

進貞懿皇后哀冊文狀

常袞

右奉進旨令臣撰詞訖謹隨狀封進伏以纂述坤儀弘宣  
聖悼禮有追冊文以叙哀前代以來舊章不易屬詞之重  
高選文臣晉之恭后則王彪之顏延年咸製其詞哀華者  
稱至貞觀中文德皇后遷座特詔虞世南撰述編於文館  
永播徽音此二臣者皆以鴻藻奮於一時用能紀皇壺之  
風煥青史之簡臣才學甚淺典策非工承詔兢悚匪惶夙  
夜伏自循省叨竊至深陛下往命貴妃追封殊號冊謚之  
令皆臣奉行德範柔明多所遺闕退思鄙薄于今愧赧况  
又獲承慈旨重紀芳猷雖竭庸庸慚無麗藻屬文明天下  
多士盈朝顧其式瞻何以昭示冒嚴上獻益用兢惶無任  
戰懼之至

校四三十二字

十月二十八日

文苑英華卷第六百四十一

文苑英華卷第六百四十二

狀十五

進貢下

進金花銀櫻桃籠等狀一首

進白蕉狀一首

進婆羅樹枝狀一首

進古銅器狀一首

進金盞并甕子狀一首

進甕器狀一首

進馬狀一首

進異馬駒狀一首

進白兔狀二首

進鷹狀三首

進雙鷄狀一首

進白雀狀一首

進金花銀櫻桃籠等狀

令狐楚

右伏以首夏清和含桃香熟每聞採擷須有提携以其鮮

紅宜此潔白前件銀籠并煎茶具慶等羨餘舊物銷鍊新  
成願承薦寢之羞敢効梯山之獻其通犀璠瑁上藥等買  
並依價採皆及時誠非珍竒恐要聚蓄勤奉丹款不敢不  
進

進白蕉狀

前人

右伏以半夏欲生正陽初王將勝時熱在新其衣前件白  
蕉先時織成依價市得光雖讓雪踈不礙風願充當暑之  
服爰申任土之貢干冒宸聰無任戰汗

進娑羅樹枝狀

張謂

右所管四鎮境天竺山壓枝一作園國有拔汗那最為密  
近乃一作有娑羅樹特稱竒絕不庇凡草不棲惡禽聳幹

無慚於松柏一作成陰不愧於桃李但以生非得地譽絕  
因人榮枯長在於異方委棄不聞於中土陛下高視三代  
橫制四夷威信浹於君長仁惠沾於草木前件樹枝臣去  
載已進訖臣伏以凡遵播殖貴以滋多今屬陽和之時願  
助生成之德近差官於拔汗那計會又採前件樹枝二百  
莖並堪進奉如得託根長樂擢穎建章布葉垂柯隣一作  
非月中之丹桂連枝接影對天上之白榆於物無遺在人  
知感謹差軍將李涌押領赴京

賀衢州進古銅器狀

張九齡

右伏見衢州所進瑞魚銘等神物環竒形製純古魚為龍  
象既章受命之元銘作龜文更表錫年之永河圖舊事無

以加之臣升集作贊休明屢承福應恭惟拜慶倍百恒歲  
伏望宣付史館傳之不朽無任喜躍之至

進貢扶風縣平地穿得金盞二枚并甕子一枚狀

于公異

右臣得所由狀送前件物至臣所者輒令瑩拭非是常珍  
宜在昇聞輒敢上獻陰陽造化神妙潛功群生既偶於昌  
期靈貺豈私於聖德伏惟皇帝陛下化通玄默躬贊昇平  
神功所以服不庭大孝所以尊清廟故夫惟儲慶雲物表  
瑞於非煙地不韜珍宝玉騰光於內府陛下方弘至道爰  
紀殊祥仰聖德而彌高在天心而難讓至如此寶安敢無  
言觀其形製標奇非一時之物精輝旁射逾百鍊之珍臣

輒比擬他金光芒獨映求之故事未或前聞表孝通誠美  
已彰於盈缶徵神錄異慶常美於化鈞况其賦質堅剛銷  
形盡瑩膺大雅獻酬之用告太平歡樂之符時佇休明潛  
躍久同於瓦礫道合交泰成器堪佐於罇壘况因封管而  
生似表微衷而獲儻從殊貨是更褒揚必取類於金堅至  
遂成於家寶期於銘刻傳在子孫長承聖主之恩使効微  
臣之節

代人進甕器狀

柳宗元

五字六字真下

甕器若  
干事

右件甕器等並藝精埏埴制合規模稟至德之陶  
蒸自無苦窳合太和以融結克保堅貞且無瓦釜之鳴是  
稱土礪之德器慚瑚璉貢異器丹旣尚質而為先宜當無

而有用謹遣某官某乙隨狀奉進謹奏

進馬狀

元楨

同州防禦使供進烏馬一疋八歲堪打毬及獵右臣竊聞  
道路相傳車駕欲覽遊幸温湯未知虛實者臣職居守土  
侍從無由集作因羨魏闕之埃塵猶隨日御恨新豐之鷄犬

亦聽車音目斷魂消形留神往幸又得進奏官狀知河中  
華州京兆府並於昭應排比進獻臣當州素乏所出無以

粗展丹誠臣既別受恩私又不合獨無壤莫伏以前件馬  
北方正色東道竒蹤調習多時備諳材力集作色解擊毬者

每嘉其環回斗轉動可集作必愜心善獵射者皆歎其度壘  
踰溝走不換足欲隨正至獻賀竊慮群眾混同徘徊顧瞻

蓄銳斯久今者宸遊近甸地降靈泉施展是時戢藏何益

伏望陛下揚鞭頓轡取驗其馴良結尾絡頭試觀其神彩  
臣某深恩未報愚志空存自慚駕鈍之姿莫展驅馳之効

捫心戀主因馬喻身輕冒天威無任戰汗其馬謹隨狀進  
謹進

進異馬駒狀

令狐楚

右臣得征馬使穆材狀謹具毛色如前者臣伏以行地之  
用莫神於馬擅華名者則衆効竒質者甚稀伏惟陛下廣  
大際天高明配日殊祥競發休祉荐臻前件馬稟天駟之  
精體坤元之德毛拳惟細鬣赤而高尾掉肉而蜿螭額帶  
星而倜儻臣謹差虞侯辛峻專往覆視俱如前列峻云雙

瞳有耀四蹄如削宛然天產定是龍媒允協建午之辰光  
昭太一之貺臣見今就太原府養調旬月稍任行步即專  
陳獻謹差某官聞奏

為太原李說尚書進白兔狀前篇作表非前人貞元十二年

右臣得嵐州刺史趙挺健六月二十九日狀稱嵐州合河縣  
太平鄉大慶村收獲前件白兔差行官李希林送到者臣  
謹按瑞應圖曰白兔壽千年歲蒲伍百則色白又曰王者恩  
加耆老則白兔見臣伏以白為正色兔實仁獸來皆有為  
前篇出必以時伏惟陛下聖壽無疆神功不宰是故太陰  
作應精魄降以為瑞皓質玉立素毛霜垂清明不讓於殷狼皎  
潔可齊於周鹿况村為大慶鄉號太平無為而成不索而

獲協元符之一氣彰皇德於千齡雖標中瑞之科實應太  
廟之曲前篇臣忝守藩前篇鎮觀茲休祥無任抃躍歡慶  
作典之至作方

此篇六百十二卷表門重出前已削去

同前 前人

右貞元十二年六月嵐州刺史於州界太平鄉獲白兔一  
隻臣已并圖進獻死一作斃於中路惜其誕生靈質不達明  
達誠意所求禎祥荐至今又得狀宜芳縣孝義鄉百姓王  
貞收得前件白兔送到者臣謹按瑞應圖云王者仁及鳥  
獸則白兔見臣伏以兔之為獸最狡者多獸之有毛龐雜  
者衆臣觀前件兔皓然養素恬爾守柔處群萃以自殊抱

貞明而不汙皎如疊雪燦若凝霜克生孝義之鄉實表中  
和之化伏惟皇帝陛下恩覃動物澤及毛群方弘三尚之  
仁果應千齡之瑞若非上天慈惠下土清平則安得四年  
之中再見其地信可以摘皇上之懿德薦臣子之明誠  
彰可徵盼矚如荅臣覩茲潔朗宛在封疆踴躍欣歡實  
恒品謹遣某官并圖隨狀奉進

為易定張令公進鷹籠狀

鄭綱

右件鷹臣去秋來頻令入草一一棟擇皆有所能試其搏  
擊下韜必中伏以上囿五方固多殊異之選下土一物實  
表臣子之誠敢望備羽獵於長楊從蒐狩於天仗輕瀆  
宸無任屏營之至

進白鷹狀

張謂

右臣管內大小鷹娑羅山採得前件鷹簡擇並堪進奉特  
稟異氣挺生殊姿頭圓頂平臆潤脰短丹目時轉志凌雲  
霄花毛始齊色靜霜雪既拔竒而賞異實超等而殊倫但  
四鎮川原千里砂磧草木既少禽獸亦稀礪志疑瓜距調  
其羽翮徒有願於擊搏竟無階於効用今寒風凜冽殺氣  
嚴凝萬乘時巡六龍冬狩出樊籠之地登校獵之場必能  
隨人指蹤驅御苑之狐兔順時行令逐禁林之鳥雀物性  
有適天心所知

進異鷹狀

今狐楚

右臣所管採捕得前件鷹兩翅齊肩雙翎對懣雖非神俊

文苑英華 卷一百一十五  
稍似瑰竒以臣微誠輒敢陳獻風霜之後儻或得用於三  
驅鳥雀之中曾冀成名於一擲干冒宸宸無任戰越

同州進雙鷄等狀

元禎

同州防禦使供進鳥鵲并雙鷄共四聯右臣當州元和十  
五年奉宣令採雙鷄五聯各重四斤頻年採取一聯不獲  
自臣到州詢問採捕人等皆云二十年前採得一聯雙鷄  
爾後不曾採得昨旬日之內併獲兩聯斤兩輕重稍符詔  
旨况浚郊初啓旣已大剪豺狼鷲鳥員來可以助清梟獍  
臣所以恨身無羽翼不獲陪奉屬車擒狡兔之根源破狐  
狸集作妖狐之群黨臣某無任忘軀思奮覩物感恩之至謹遣  
某官某乙隨狀奉進謹進

為政事進白雀狀

蘇頲

右巢於黃門外雀過官廳事丹眸瑩微明若流珠嘉毳鮮  
華光如蘊玉臣等謹按瑞應圖白雀主鐵券陰之精也不  
來則國無俊嗣伏以清宮踐位慶重離於上天黃閣曾巢  
屬五瑞於明日固以事優御符聲高作頌臣等叨陪近侍  
喜萬恒情無任抃躍之至



文苑英華卷第六百四十二

十月二十八日

文苑英華卷第六百四十三

狀十六

雜奏狀

奏度女道士等狀二首

代伊僕射奏請女正度狀一首

奏得嘉禾嘉瓜狀一首

奏行營兵馬狀一首

奏投降回鶻狀一首

奏黃家賊事宜狀一首

奏太原官吏選數狀一首

奏教習長槍弓弩狀一首

奏排比第二般差撥兵馬狀一首



奏教兵馬狀一首

奏差赴許州兵馬狀一首

奏加嶺南州縣官料錢狀一首

奏推管長平義倉狀一首

奏令子弟主辦遷奉狀一首

奏孝子劉敦儒狀一首

奏百姓割股狀二首

奏誅逆人等狀一首

奏黃州錄事參軍張紹葉妻狀一首

奏賤姜鉢狀一首

奏度女道士無名尼等狀

王仲周

右伏以代理弘道三教同歸聖誕佳辰萬靈叶慶上件女  
道士無名尼或早授畢法已聞具戒願編僧道之錄永遂  
修持之心今因降誕日伏乞賜其正度

奏姚季立妻克女道士狀

前人

右件驍將自貞元年身亡其妻行服三年情禮畢備去歲  
秋首已及祥除素習真經志願入道伏以草野之人能修  
栢舟之誓義足以勸志不可移今因聖誕之辰願崇景福  
請度克女道士法名真玄仍請就潤州道林觀

代伊僕射奏請女正度狀

呂溫

光祿大夫尚書右僕射南克郡王臣女請度尼某

乙

右臣伏以陛下降誕之辰率土蒙幸臣於含氣之內獨受

深恩集作受思所以稱慶南山獻心北極遂割骨肉之愛

俾歸岑寂之門結幽願於金仙奉勝因於寶壽冒昧上請

精誠匪他陛下以釐革初行渙汗無反憐臣整至之分事

與恩違念臣愚魯之忠貸於法外特降中使俯加慰諭臣

忝居端右之地首干畫一之科集作誠雖奉上義乖率下

合當嚴譴忽被殊私震驚失圖慙跼罔據荷降鑒之明原

情斯在蒙曲全之澤為感則深輒集作瀆宸嚴伏增殞越

謹奏

奏汴州封丘縣得嘉禾浚儀得嘉瓜狀 韓愈

右謹按符瑞圖王者德至於地則嘉禾生伏惟皇帝陛下

道合天地恩霑動植邇無不協遠無不賓神人以和風雨

咸若前件嘉禾等或兩根並植一穗連房或延蔓敷榮異

實共蒂既叶和同之慶又標豐稔之祥感自皇恩微莖何

極於造化親逢嘉瑞小臣喜過於休明無任云

奏差赴唐州行營軍馬狀 崔行先

右伏奉今日日墨詔令選擇馬軍三山騎隨中使赴唐州

臣當時已具聞奏訖臣所管士馬常經校試蓄銳斯久惟

忠益彰常持報國之心盡秉一作懷恩之分忽奉詔命頓

生光輝豈意宸私俯察誠願三軍抃舞闔境歡呼並喻以

勲忠形於感激雖慙數寡不愧衆多蔚為天討之師自假

神威之福其噐械軍容等並得鮮潔亦稍豐饒以今月十

三日從鳳翔府隨中使進發訖臣職當護塞志切除奸不獲齒列諸軍身先士卒助銛鋒於破賊逆節斯摧俾付寸燭以燎原焚枯可待臣無任憤悱踴躍之至

奉投降廻鶻大首領大將軍安達于等狀 于邵

右臣得邠州節度使牒上件人等背逆歸順云被懷恩招來打鳴沙縣便擬將叔長安為不奉可汗處分遂却廻邠寧投降並到使訖謹遣監軍使徐欽令領赴闕庭者廻鶻遠蕃素効誠節自中原俶擾累建勲庸陛下約為弟兄式崇惠好我即示以恩信親仁善隣之道彼亦懷於德澤為不侵叛之臣而逆堅猖狂間行招誘初遭誑惑雖衿甲而即戎遽感恩私竟束身而請命可汗既不助逆懷恩當即成擒殘孽永清指期非遠

代裴中丞奏邕管黃家賊事宜狀 柳宗元

右今月四日邕管奏事官嚴訓過稱押衙譚叔向等與黃家賊五千餘人謀為翻動雖已誅斬猶未清寧臣當時差本道同十將試光祿卿雷遶至邕管界首賓州以來刺集迎探事宜兼為聲援昨得雷遶十四日狀并嚴訓狀報同到其黃家賊並已退散各歸洞穴訖伏以鼠竊狗偷非足為患陛下威靈遠被神化旁行遂使姦狡集而自露回邪之黨不戮而盡滅集伏恐飛章已達吉語未聞上軫天心猶煩廟筭臣謬居方鎮忝接疆界所得事宜不敢不奏

宋方此二行在橙人名下

此狀載宗元集英華作今私楚時楚為中書舍人恐非

奏太原府資望及官吏選數狀 令狐楚

右臣得司錄參軍李且等狀稱前件府名三都望同兩府  
吏曹近日稍易舊規格限之中增加選數特乞奏聞者謹  
檢開元十一年正月二十八日勅置北都府縣資望並準  
京兆府河南府中間吏曹暫有降下前使王縉薛蕙訓馬  
燧李說并有舉奏尋蒙復舊今準三月十五日勅停減諸  
州府雙曹司錄判司及甲曹參軍特蒙勅旨京兆河南太  
原三府不在減限伏以太原府龍興盛業天啓雄藩有義  
旗起一作建起之堂為仙駕晉遊之地官標留守驛署都亭  
典章甚明制度咸在數年來吏部選格不同京兆河南兩  
府官資稍下選數則深掾吏諸臣懇有披訴儻伺疑作從  
權之義恐乖仍舊之規伏乞聖慈特勅吏部準元勅與京  
兆河南一例處分

奏教習長鎗及弓弩狀 前人

右淮泗寇猶或未一作未掃除天下人臣皆思奮擊臣伏以射  
渠魁之目勁弩為先春大憝之心長鎗是切比雖無習多  
不專精臣今選定前件官健取八月四日於城東起教不  
敢不奏

奏排比第二般差撥兵馬狀 前人

右臣伏以逆賊吳少誠孤負聖明作為奸亂尚延晷刻之  
命未即雷霆之誅天下人臣皆同憤激况臣任當旄鉞誓  
掃煙塵割飢肉以資軍亦無所苦執干戈而衛國惟恐不

堪况將士等忠義居心堅剛挺質勇於戰陣樂此征行臣  
謹差前件兵馬如前其資裝器械一事已上並無所闕續  
具發日聞奏杖其忠順兵氣自雄諭以功名衆心皆勵矧  
茲窮寇非足勞師伏望天恩不至憂軫

奏教當道兵馬狀

前人

右臣伏以不教視成爲國之蠹政有備無患前王之格言  
今吳少誠叛換汝南憑陵淮右雖鳥鳶嘯聚見彈已驚而  
枳棘萌生須鋤其本昨臣所陳章奏願往討平及奉詔書  
但令排比在軍中之百事誠有舊規以麾下之萬人要知  
新令謹取今月二十五日於東城準敕教習至二十九日  
大設後各勒歸本鎮不敢不奏

奏差兵馬赴許州救援并謝宣慰狀

前人

右中使臣希倩至伏奉詔書兼宣恩旨慰問臣今差前件  
兵馬者臣伏以吳少誠內懷奸詐上負聖明因幸隣喪遂  
虧臣節提携逆黨逼迫孤城凡在忠良不勝憤切况臣謬  
居方鎮便合封平伏蒙陛下委曲照臨丁寧誨諭感榮而  
毛髮盡勁憤啓而肺腸皆激諸軍會合計日剪除當道兵  
馬差定訖已具列狀奏聞

奏加嶺南州縣官課料錢狀

孔揆

右伏以前件州縣或星布海墻或斗一作雲絕荒外首領強  
黠人戶傷殘撫御緝綏尤藉材幹刺史縣令皆非正員使  
司相承一例差攝真庶者懇不願去貪求者苟務徇私臣

文苑英華 卷一百一十五  
自到州深知其弊必若責之以理莫若加給料錢今具分  
折如前並不破上供錢物輒陳管見務在遠圖伏乞天恩  
允臣所請

奏桂管常平義倉狀

李渤

臣伏詳勅文本救荒歟忽有危切貴及其時當州去京往  
來萬里奏廻方給豈及飢人臣請所管忽遇災荒量事賑  
貸訖續分析聞奏庶使遠人速活聖澤遐流臣之所管僻  
在嶺外迫以山賊人尤難理若令數改必困蝨食常平義  
倉本救災害向爲歟診擢臣處之方鎮臣宜竭力上答皇  
明伏乞聖恩允臣所奏庶使皇靈遠被礦俗知恩

奏準詔令子弟主辨遷奉事狀 裴次元

臣某言伏以幸遇通年奏請遷奉事伏奉月日手詔令子  
弟主辨以趨時日者私願上陳天書下降跪承恩一作命  
榮感失圖臣實不天幼丁家禍荐鍾凶釁方在童蒙逮于  
成人終鮮兄弟比以時日非便顧室且貧日居月諸未辨  
歸祔痛心疾首以候吉辰昨日一作皆陳露下情求替遷奉  
赴任之日亦具奏聞今奉詔書令子弟主辨雖懇辭上贖  
而天聽未廻荷朝廷之寄深望阡兆而心殞臣即準詔遣  
子弟專往揚州舒州主辨便赴上都續具聞奏臣揆以才  
劣職任非輕不敢重陳再煩睿覽懷罔極之感章奏冀允  
於深誠奉絲綸之書獎任益彰於聖旨顧違恩重哀荷難  
任臣不勝荒塞摧逼之至

奏孝子劉敦儒狀

權德輿元和八年時為東都雷守

孝子劉敦儒年四十九曾祖子玄祖祖貺父決住東都從善坊

右件人名儒史官之家積成教義至性誠孝感動人倫母

患風狂心緒乖亂無辜榜箠常至僵仆或凍於積雪之下

或曝於赫日之中腐爛皴瘝一作裂裂畧無完體見其楚毒方

上集作飲食敦儒蘇而復起常懼人知承順恬然不覺疾

痛因心之道貫於神明欲蓋彌彰事父方著蒸匕不墮十

有六年貞元二十集無此字非年留守常夏卿具狀奏聞奉其

年八月二十九日勅宣付史館旌表門閭臣至洛都具詳

事實聞諸族類布在風謐今又十年不改其養飢寒所迫

衣食闕然晨昏所奉朝不繼夕伏以底祿筮仕資廕多門

至行絕人尤可嘉獎伏望天恩特授一解褐京官使分同

就養則私計集作計食可給寸祿為榮庶厚時風以弘孝理特

乞聖慈允臣所奏集作請謹錄奏聞伏候勅旨

奏百姓王士昊割股狀 令狐楚

右臣得太原府牒前件人為母阿張患病割股奉母其母

所得疾漸損者臣伏以登于大孝在禮為難忍其甚痛於

人不易王士昊長於市井利在錐刀誓以誠明之心療其

羸老之疾割肉於股饋羨于堂信可以感通神明風變人

俗其猥司廉察獲守方隅以此至性恐湏旌表

奏榆次縣馮秀誠割股奉母狀 前人

右臣得太原府牒前件人為母父患割股奉母所疾漸損



者臣差當縣主簿劉戡檢驗得狀具如前申者臣伏以縱  
螫及膚口猶難忍援刀刺骨心豈易安前件人出於試畝  
之中長在草茅之下天生仁孝日用元和忘甚痛於已軀  
期有瘳於親疾人倫共感名教所宗斯實陛下仁奄周王  
孝逾虞帝陶蒸動物之性啓迪仁人之心况臣守在方隅  
職司廉察擬其至行恐合褒稱

奏誅逆人等狀

于邵

右前件官等或久登清貫或厚受國恩天步艱難不隨清  
蹕偽庭頡頏忍飲盜泉或脩撰文書或統制兵馬或動衆  
以資敵或作奸以蠹人事跡昭彰實不可掩臣等初命禁  
錮伏候聖恩輿議囂然皆將俾刃此輩大逆無道覆奏  
容臣參諸禮法按軍令訖匿瑕舍垢誠君父之恩私嫉惡  
剛腸亦臣下之職分擅此處置伏增戰越

奏黃州錄事參軍張紹棄妻狀

牛僧孺

右臣得張紹妻盧氏狀其張紹寵婢花子每令無禮相陵  
臣推問有實者伏以張紹忝跡衣冠幸陶德化不敦二姓  
之好敢瀆三綱之經嬖惑女奴蔑侮妻室非特一作衣服

飲食貴賤渾同兼亦待遇等威衽席顛倒款招明白愆尤  
至多縱稟性庸愚靡及於教義而歷官州縣合聞於憲章  
逞其邪心曾不懼法顧茲醜行恐玷大猷臣職在觀風事  
先按俗有關政理敢不申聞伏乞明示罪名流竄遠地使  
人知家道以誠士林謹具奏聞伏聽勅旨

奏貶晉陽縣主簿姜鉢狀為人 令狐楚

右臣劉氏堂外生即故硤州刺史伯華嫡孫左補闕某弟  
三女是臣亡叔庶子絳州刺史勛外孫父身早亡臣妹多  
病遺孤寡婦無所依投及臣總戎來相依止臣見其長成  
須有從歸其姜鉢又在太原曾任主簿誠非匹敵誤與婚  
姻豈料如獸之心同人之面縱橫克悖舉止顛狂旬月之  
間豪橫備極惡言醜語所不忍聞有忝祖宗難施面目臣  
以為夫婦之道無義則離因遣作書遂令告絕矜其愚下  
擬許生全而將校等二十三人播進於庭確論其事具如  
前例請以上聞雖忍孤兒可欺其如眾怒難息特希寬諒  
以雪寃疑干冒宸袞伏增戰越之至

文苑英華卷第六百四十四 狀十七

陳請

請亡母邑號狀一首 請公除狀三首

論清舜廟狀一首 虜州請隨例行香狀一首

請施行六典開元禮狀一首

奏新羅請廣利方狀一首

請孫守亮代男行營事狀一首

為南承嗣請從軍狀一首

請行軍司馬及少尹狀一首

奏請不叙錄將士狀一首

奏請東都洒掃狀一首

開廡使奏判官改名狀一首

請立前節度使李德裕政碑狀一首

爲長安馬明府亡母請邑號狀 宋之問

臣亡母在於一作屬在外戚夙忝末姻不蔭慶雲早先朝露臣

髮膚遺體是亡母所生金紫通班乃聖朝所賜臣每服一

輕妙嘗一甘鮮何曾不遠媿劬勞近慚榮寵又見同列有

太君拜邑命婦入朝臣早孤偏不勝感羨母因子貴幸者

何多祿不及親臣獨含恨明年某月改塋有期私門大事

莫踰於此臣內寡材術謬忝朝恩外無愆尤夙承母訓郡

縣之號翻及臣妻哀榮之禮不霑臣母臣生不侍養歿未

追榮若懼不敢祈恩偷生以安厚祿儻歸泉壤何對慈顏

臣死罪死罪臣準某年月日制令加一階伏乞廻臣此階

追贈亡母又臣身死之後合有鼓駕出郊在臣何顏存歿

叨僭亦許臣亡母用臣威儀臣身當以遠蔭存榮死足所

祈越禮罪實干誅伏惟陛下孝理寰瀛仁及草木皇室之

戚軒冕盛於前朝太后之親恩澤踰於曩日臣幸遇非常

之主敢祈不次之恩伏乞陛下少念葭莩垂哀犬馬回臣

休寵以慰營魂則今日以前報恩於亡母自茲以後盡命

於聖朝無任慙懇悲慕之極謹進狀陳請以聞

爲政事請公除狀三首 蘇頲

臣等聞喪禮俯就所貴從宜古先哲王莫非孝子則知服  
紀漸變以至於除旣除之後無不從吉祔即吉祭示不可

踰頃者正自山陵奉安宗廟終服變禮今則其時執而不  
行將何用禮伏惟皇帝陛下孝思罔極首冠禮經然以神  
器至公理循故實今尚未臨正殿猶御慘衣夫以安上理  
人莫善於禮今若順情廢禮何以正人群下顯然不知所  
措臣等謬陪樞密輒敢陳祈伏乞以禮制情式遵常典無  
任悚迫之至

二

臣等伏奉墨制固違群情一作請未許公除臣等茫然罔知  
攸措臣聞孝者貴合道禮者貴從宜合道始可行孝從宜  
始可達禮况先皇遺旨行孝者共遵國朝舊章達禮者同  
守非宜將焉用禮違命豈得稱孝伏以至尊之制與凡庶  
不同故易月更除以時漸降山陵既畢謂之反虞宗廟當  
祔無不從吉今若除不易月降不以時豈得虞而不祔尚  
居喪服所以先儒執禮適變而除王者從權將除必降伏  
惟聖懷永慕雖增罔極故事不遠孰可虧違臣等至愚期  
於死請

三

臣等愚昧頗觀禮典數百年來漢晉間事主天地者不以  
私廢公行喪紀者故以日易月貞觀之後三宗遺訓著在  
實錄垂之不朽匪臣等敢率下情屢希上達伏以聖懷罔  
極孝思未慕夫人祗之大願持曾閔之小節使祖宗之禮  
家國成規陛下因而違之臣等固知其不可皇極神器天

下至公曠時不親衆務皆闕阻群情非順也顛顛億庶仰  
望天光徂夏及秋旬有四月陛下何以承顧託何以撫黎  
元臣等惶然不知忌諱敢昧死陳請冀垂昭納明日望於  
別次視事以寧臣子荒迫之心

論清舜廟狀

元結 永泰二年

右臣謹按地圖舜陵在九嶷之山舜廟在太陽之溪舜陵  
古老已失太陽溪今不知處秦漢以來置廟山下年代寢  
遠祠宇不存每有詔書令州縣致祭奠酌荒野恭命而已  
豈有盛德大業百王師表沒投集作於荒裔陵廟皆無臣謹  
遵舊制於州西山上已立廟訖特望集作乞天恩許蠲免近  
廟三五集作一兩家令歲時掃拂集作拂灑以示集作示爲恒式豈獨表

聖人至德及於萬代實欲彰陛下玄澤被於無窮謹錄奏  
聞勅依

處州請隨例行香狀

齊映

右準式文臣當州不在行香之數伏以聖朝弘孝御下崇  
德追先憑法力於傳香表未懷於率土下垂甲令旁感物  
情臣州稍以遐遠比於列郡遂漏恩私俱成亭育之中獨  
隔情禮之外况語桂廣則道里猶近並接衢婺則州望悉  
同推於等夷倍切誠懇又垂白之老一命之士或生於開  
元天寶或逮事肅宗代宗從頂至足生成是賴五月六月  
思慕彌深方當感切之辰難抑衆庶之意臣又以國家榮  
建寺觀繼度緇黃所種田疇已爲優厚食時受供皆荷殊

恩忌辰脩齋當茲別給如蒙聖澤許同隣州應緣香燈所需皆率官吏取足於刺史以至末班輕減俸錢敬修法事庶使山越遺老咸覩漢儀海郡具僚率由唐典無任至誠至懇之至

代鄭相公請刪定施行六典開元禮狀 呂溫

右臣聞化人成俗莫大於禮樂垂統建中必資於制度然而忠敬有弊質文異數群儒之得失鋒起歷代之沿革絲棼或榮古而漏今名實交喪或違經而便事本末相忘或煩雜集作以為詳或闕略而集作為要未聞折衷以通方國家與天惟新改物視聽太宗拯焚溺之餘粗立統紀玄宗承富庶之後方暇論思爰勅宰臣將明睿旨集儒賢

於別殿考古訓於秘文以論材審官之法作大唐六典三十卷以導集作德齊禮之力作開元新禮一百五十卷網

羅遺逸芟翦竒邪豆百代以旁通立一王之定制草奏三復祇令宣示中外星周六紀未有明詔施行遂使祭喪冠婚家猶異禮等威名分官靡成規不時裁正貽弊方遠伏惟睿聖文武皇帝陛下恢纂鴻業升于大猷雷霆奮有截之威日月廓無私之照三叛就戮四夷來賓牛馬放集作

於農郊兵革藏於武庫嚴禋上帝祇受鴻名惟懷永圖不自滿假昧爽聽政子夜觀書處成功而弗休率集作至理

若不及每懷經始則知貞觀之難言念持盈思復開元之

盛臣謬忝密集作務兼掌圖籍無能輔弼集作已負於恩

私有所建集作明豈先於典禮伏見前件開元禮六典等

聖集作朝所制鬱而未用奉揚遺美允屬欽明然或損益

之間討論未盡或弛張之間宜稱不同將貽末代之規必

俟集作不刊之妙臣請於常參官內選學藝優深理識通

遠集作者三五人就集賢院各盡異同量加刪定然後敢

塵集作睿覽特降德音明下有司著為恒式使公私共守

貴賤遵行苟有僣違必正刑憲如此則職官有制將興濟

濟之詩風俗大同坐致熙熙之詠見可而獻知無不為輒

瀆宸嚴伏增殞越謹狀

代淮南杜司徒奏集作新羅請廣利方狀

劉禹錫

淮南節度觀察處置等使勅賜貞元廣利方五卷右臣得

新羅賀正使集作如言狀稱請前件方狀一部將歸本

國者伏以纂集神効出自聖衷藥必易求疾無隱狀搜方

脉之秘要拯生靈之夭瘥坐此華胥咸躋仁壽遂令絕域

逖聽風聲美茲豐功爰有誠請以其久稱藩附素混車書

航海獻琛既以通於華禮釋疴蠲疾集作宣獨隔於內集

外區正當四海為家冀覩十全之効臣即欲寫付未敢自

專謹錄奏聞

請孫守亮代男行營事狀代郭子儀于邵

右臣前日而奉進肯前件男領兵馬赴靈州伏以朔方軍

幕宿將頗多任以兵權合先勳舊非獨藉其時望亦以厭

伏衆心男晞年纔成立素不更事雖薄閑騎射而未有智  
謀軍政弛張或非詳練昨緣逆徒在近畿旬多虞令統先  
軍以當大敵倉皇之際不可固避畢力捐軀幸摧堅陣此  
天威所及非童子有成欲速赴邊陲實恐未堪專任右廂  
兵馬使開府孫守亮出身入仕皆在軍行將校畏威士卒  
懷惠智能料敵勇可摧兇使與渾日進同行必冀免貽聖  
慮又男晞自幼及長首末隨臣常在私庭未嘗遠行深願  
容其澣濯許以旬月休閑他日更有任使敢不奔波道路  
臣位崇寄重効淺恩深常恐委任失人以速官謗知子者  
父敢不上陳伏乞天慈俯哀誠請

爲南承嗣請從軍狀

柳宗元

故某官贈某官某乙男某官某乙右臣亡父至德之歲死  
節睢陽陛下每降鴻恩必加褒寵臣自七歲即忝班榮垂  
五十年常居祿秩再守遐郡績用無成終貽官謗其就嚴  
譴無以負荷先志報効殊私以慚以懼殞越無地伏見某  
月日勅以王承宗負恩干紀命將徂征雷霆所加殘集作珍  
滅在近臣竊不自揆思竭忠誠願以集作預一卒之任以答  
百生之幸庶得摧集作推鋒觸刃摩壘塞旗冀獲盡於微誠  
儻不墜於遺烈踴躍之至夙夜靡集作不寧敢希皇明俯鑒  
卅懇臣聞周官考藝國子置車甲之司漢道推恩孤兒備  
羽林之用千秋思奮於事越仲孺期死於奔吳義激君親  
名高竹帛臣雖無似有慕昔人雖身塗草野死而不朽披



汗瀝血昧死上陳無任懇迫憤激集作忠憤之至謹錄奏聞伏候勅旨

請行軍司馬及少尹狀爲人作

令狐楚

右臣適蒙恩獎獲守方隅力小任大常憂敗累伏以行軍司馬相副之職知府少尹共理之官未得其人久空此位每平均征賦繕理邊陲實藉通材以分重寄伏惟陛下察臣心之懇款知軍務之殷繁選於中外爲此別貳陛下所用即臣所知苟獲同心庶無闕事謹遣某官奉狀奏請

爲滎陽公奏請不叙錄將士狀 李商隱

使當道將士及管內昭賀等州軍士共二千一百二十六人準去年五月五日制叙勲階使司去今年四月二十五

日具將士姓名及甲授年月日申省訖右臣當道將士等遠當戎寄式控遐陬乘解愠之和寧親矢石望拱辰之列實隔煙波近者朝廷奄靖北方惟荒東道當陰山之哭虜靡効織埃及天井之摧凶不橫寸草徒以皇帝陛下非煙

結彩集作蔭滾露流光向明綽及於鳳樓布澤遠霑於蠻徼

固合同承國慶共稟朝榮伏以當管近無豐年亦經小水海上有分屯之卒邕南有未返之師歎冗食於居人困裹糧於戎士臣初叨燕問方切拊循雖拾給升階各思受寵而濡毫執簡無以爲資仰慮後期敢忘積懼伏見此者諸道有物力未足者聖恩洪貸許且權未叙錄竊緣往例冒此上陳伏冀天慈曲垂矜許臣與將士等無任感激冒昧

戰越之至

為楊贊善奏請東都洒掃狀

前人

右臣先臣贈太保其塋在河南縣界臣自終喪紀便參朝  
倫三年贊道於宮庭千里違離於墳墓竊惟令式合許  
除追遠興情敢希塋於陸擘報恩未死寧自誓於義之伏  
乞聖慈特從一作鑒丹懇一作集作九

為閑廐使奏判官韓勵改名狀

前人

右前件官名與再從叔故媯州參軍自勵向下一字同伏  
以韓自勵頃因官遊歿於幽朔羈孤未返親黨莫知近始  
言歸因之合族雖為子之道則慎更明於已孤而諸父之  
集作來固難舉諱於其側伏請改名融謹錄奏聞伏聽勅

音

請立前節度使李德裕德政碑文狀 張次宗

右伏以勲著王室者則銘於景鍾功及生人者則刊於樂

石故扶風存必拜之地峴山有墮一作墜浹之思固有舊章

蓋無虛美竊以李某績慶相門伏膺儒業得卻殺詩書之

學兼祭遵儒雅之風自授任坤方鎮安全蜀亭戍多警災

早相仍外有定戎一作鎮定之功則城柵相望內有繕完之備

則器甲惟新強寇將罷其東漁隣敵自止其南牧况今令

一作行屬郡威肅連營來暮之謠已彰於昔歲去思之美

無謝於古人今合境同詞諸郡獻狀雖黃霸入用隗方盛

於登賢而鄧候不畱情猶深於愛樹臣謬當交代備聞政

能願嗟卧輒之情特允紀功之請無任云云

為馬明府母請邑號狀若懼此下集制令制合遂除此下集有

校四十字補校記三十三字十月二十九日

文苑英華卷第六百四十四

文苑英華卷第六百四十五

檄一

檄一此卷英華所編失年代先後今正之

為彭城王檄征鎮文

為太祖檄齊神武高歡文

為東魏檄梁文

為行軍元帥鄭國公檄陳文

為北齊檄陳文

為侯莫陳悅檄陳蕭摩訶文

隨檄陳尚書江惔文

為彭城王檄征鎮文

孔熙元先令弟休先作

揚州刺史徐湛之告四方王公守宰夫休否相乘天道無

常一作道 狂狡肆逆明哲是殛故小白有一匡之勲重耳無桓秦

有翼戴之德自景平肇始皇室多故大行皇帝天誕英姿

聰明睿武一作哲 拔自藩國嗣位統天憂勞萬機秉一作心

庶務是以邦內安逸英華作邦家 安危恐非 四海同風而頃一作年

已來姦豎亂政刑法違衷一作刑 罰乖淫 陰陽潛一作 舛致使蒙

起蕭牆飛禍卒集一作危 禍萃集 賊臣趙伯符積怨含毒遂縱兇

醜一作姦 兇 肆兵犯蹕禍流儲貳一作 宰 崇樹非所一作類 傾墜皇

基罪百浞徂過千玄莽開闢以來未聞斯比率土叩心華

夷泣血咸懷亡身之誠同思糜軀之報蒞之畢與行中領

軍蕭思話行護軍將軍臧質行左衛將軍孔熙先建威將

軍孔休先忠貫白日誠期一作 著 幽顯義痛其心事傷其目

殺命奮戈萬殞莫顧即日斬伯符首及其黨與雖豺狼即

戮惟新告始一作王 道惟新 而普天無統一作 主 羣蒙靡係一作 莫繼 彭

城王體自高祖明明一作 聖明 在躬德格天地勲溢區宇世路

威夷勿用南服龍潛鳳棲于茲六稔蒼生饑德億兆渴化

豈惟東征有鷓鴣之歌陝西有勿剪之歎一作 思 而已哉靈

祗告徵祥之應識記表帝王一作 者 之符上愜一作 谷 天心下

令人望一作下 愜民望 正位辰極非王而誰今遣行護軍將軍臧

質等齋皇帝璽綬星馳奉迎百官備禮駱驛繼進並命羣

師鎮戍常若干撓義徒有犯無貸昔年使反湛之奉賜手

勅逆誠禍亂預覩期萌令宣示朝賢共拯危溺若無斷謀

事失於後機遂使聖躬濫酷大變奄集哀恨崩裂撫心摧

事失於後機遂使聖躬濫酷大變奄集哀恨崩裂撫心摧

梗不知何地可以厝身輒督勵阨頓死而後已一作皆宋書苑畢傳  
英華錄謀逆之檄未詳

為周太祖檄齊神武高歡文西魏末熙三年

蓋聞陰陽施用盛衰相襲苟當百六無間周書作三五皇

家創歷陶鑄蒼生保安四海仁育萬物運距孝昌屯沴屢

起隴冀搔北史作騷動燕河狼顧雖靈命重啓蕩定有期而乘

釁之徒因生羽翼賊臣高歡器識庸下出自輿阜罕聞禮

義直以一介鷹犬効力戎行覲冒恩私遂竊北史榮寵不

能竭誠盡節專挾姦回乃勸爾朱榮行茲篡逆及榮以專

政伏誅世隆以兇黨外叛英華作世濟凶黨非歡苦相敦勉令取京

師又歡吐萬兒復為弑虐英華作傷殺恭虐斲立建明以令天下

假推普泰欲竊威權並歸廢斥俱見酷害於是彌兵河北

假討爾朱亟通表奏云取讒賊周書作敗既行廢黜遂將篡弑

以人望未改恐昇鑊交及乃求宗室權允人心天方與魏

必將有主翊戴聖明誠非歡力而歡阻兵安忍自以為功

廣布腹心跨州連郡端揆禁闈莫非親黨皆行貪虐窳窳

生靈而舊將名臣正人直士橫生瘡痍動挂網羅故武衛

將軍伊琳清貞剛毅北史作貞直武毅禁旅攸屬直閣將軍鮮于

康仁忠亮驍傑爪牙斯在歡收而戮之曾無聞奏司空高

乾是其黨與每相影響謀危社稷但以姦志未從恐先泄

漏乃密白朝廷使殺高乾方哭對其弟彌天子橫戮孫騰

任祥歡之心督並使入居樞近伺國間隙知歡逆謀將發

任祥歡之心督並使入居樞近伺國間隙知歡逆謀將發

相繼歸逃歡益加撫待亦無陳白然歡入洛之始本有姦  
謀令親人蔡雋作牧河濟厚相恩贍以為東道主人故關  
西大都督清水公賀拔岳勲德隆重興亡攸寄歡好亂樂  
禍深相忌毒乃與侯莫陳悅陰圖陷害幕府以受律專征  
便即討戮歡知逆狀已露稍懷旅拒遂遣蔡雋拒代令寶  
泰佐之又遣侯景等云向白馬輔世珍等徑取石濟高隆  
之及婁招等屯據壺關韓軌之徒擁眾蒲坂於是上書天  
子數論得失訾毀乘輿威武疑作侮朝廷藉此微庸冀效大  
寶溪壑可盈禍心不測或言徑赴荆楚開疆於外或言分  
詣伊洛取彼讒人或言欲來入關與幕府決戰今聖明御  
運天下清爽百僚師師四隩來暨人盡忠良誰為君側而

微威福自己生是亂階緝搆南箕指鹿為馬苞藏兇逆爾  
我神器是而可忍孰不可容幕府折衝宇宙親當受脤銳  
師百萬穀騎千羣裹糧坐甲唯敵是俟義之所在糜軀匪  
慘類有詔書頒告天下稱歡逆亂微兵致伐今便分命將  
帥應機進討或趣其要害或襲其窟穴周書作宅電繞地擊務  
合星羅而歡違負天地毒被人鬼乘此掃蕩易同俯拾歡  
若渡河稍逼宗北史作宮廟則分命諸將直取并州幕府躬自  
東轅電赴伊洛若固其巢穴未敢發動亦命羣帥百道俱  
前轅裂賊臣以謝天下其州鎮郡縣率土人黎或州鄉冠  
冕或功勲北史作勲庸世濟並宜捨逆歸順立効軍門封賞之  
科已別有格凡百君子可不勉旃周書作勲北史作哉

時濟神武稍通京師魏帝遂入關周太祖乃奉魏帝都長安披草萊立朝廷軍國之政或取決於太祖

此篇英華所載甚略今以周書北史增入

為東魏檄梁文

杜弼藝文類聚作魏收

觀夫辰象麗天山岳鎮地方以類聚物以羣分建之以邦

國樹之以君長日月於是莫二一作式宇宙歸一作帝所以摠一

雖五運相推百王革命此道之所一作行孰之能改一作能易

而皇家承統光配彼天義洽幽明化周動植崇文德以來

遠脩禮讓以止訟舞干戚於兩階執玉帛於萬國玄功潛

運至德旁通百姓日用而不知兆民受賜而無迹唯彼吳

越獨阻聲教匪民之咎責有由焉而元首懷止戈之心上

宰薄兵車之會遂解繫南冠喻以好睦舟車遵沂州陸同

光亨徽息奔走之勞屯戍無逼卒之變雖嘉謨長策爰自

我始而罷兵息民彼獲其利侯景豎子本無事一作業乃

枉道於人間遂乾沒於世上鳴伏於爾朱之門鎮守於普

泰之日魯無為主之識詎有挈瓶之智既而投命義旗歸

身幕府殊異雍齒有類丁公時逢寬政得免大戮棄其瑕

滓收其力用預在行伍參跡驅馳及秦隴逋誅每事經略

以河南是空虛之地漢陽非兵戰之衝薄存犄角聊示旗

鼓豈資實効寄以遊聲軍機催勒蓋維景任摠兵統旅則

有司存而愚褊有積驕憤遂甚屢犯軍紀自生疑貳禍心

潛構翻成亂階負恩棄德罔恤天討不義不昵厚而必顛

委慈毋似脫屣棄寵弟如遺芥龍鍾稚子痛苦成行變彼

諸姬破亡為伍，滅伯春之婉轉，慕姜兒之爽言，不與狼虎  
 同仁，而共豺狸等惡。及遠託關隴，依憑姦異，逆主定君臣  
 之分，賊臣結兄弟之親，解其倒懸，仰人鼻息。一日無恩，終  
 成難養，俄而易慮，躬擐干戈，釁暴惡盈側，首無託以金陵  
 逋逃之藪，江南統御一作之地，甘辭卑體，進熟圖身，讒言  
 浮說，抑可知矣。叛豎投命，豈將擇音而偽朝，大小幸災，志  
 義主荒於上，臣蔽於下，逐雀去草，曾不是圖，竊寶叛邑，椒  
 蘭比好人，而無禮其能國乎。亦既失信不亡，何待今帝道  
 休明，皇猷允塞，四民樂業，百靈効祉，故丞相材標國貞，道  
 潤時雨，義冠伊霍，勲蓋桓文，大君立德，世功世祿，作民舟  
 楫，為國棟梁，內外齊心，上下同德，蛟騰虎嘯，風生雲起，

日則車懸轉舍排山則龍門洞開吞雲夢於胸中運天下

於掌內雖有賊臣去國亡卒出境何異一毛之落牛體雙

鳧之飛海曲一作濱彼既連結姦惡斷絕隣好追兵保境縱

盜侵國蓋物無定方事無常勢或乘利而受害或因得而

更失是以吳侵齊境遂致勾踐之師趙納韓地終有長平

之役矧乃鞭撻疲民侵軼徐部築壘擁川捨信邀利此而

可忍孰不可懷是以援乘麾殞之將投石拔距之士深衛

偽主信納亡叛含怒作色如赴私讐意存涉血義不旋踵

攻戰之利實若有神徵兵聚眾依山傍水舉螳螂之斧被

結蟻之甲當窮轍以待輪坐積薪而候燎及其鋒刃斃援

埃塵旦接便已亡戟棄戈土崩瓦解貞陽以從一作子之



親為戎首之任非獨一作力屈道窮亦將無路還蜀

復一作挾子垂翅俱在籠樊將士以昧禍之心為助亂之事

皆掬指舟中披甲披鼓下同宗異姓纍纍相望曲直既殊強

弱不等父出子孤自取其敗違卜復諫何以辭責雖復貪

利苟得背同即異獲一人而失一國見黃雀而忘深井食

鈎吻以療饑飲鳩毒以救渴智者所不為仁者所不向誠

既往之難迹猶將來之可追景以鄙俚之夫遭風雲之會

位登三事邑啓萬家揣身量分久當止足而周章向背離

披不已夫豈徒然意亦可見彼乃示之以利器誨之以慢

藏使其勢得容姦令其時堪乘便既南風不競天亡老賊

奸謀將復作矣然則摧堅強者難為功拉枯朽者易為力

計其雖非孫吳猛將燕趙精兵猶是久涉行陣曾習軍旅

豈同輕剽之師不比扼腕之眾距一作此則作氣不足攻

彼則為勢有餘恐尾大於身踵躃於股倔强不掉狼戾難

馴呼之則反速而釁小不徵一作則叛遲而禍大會應遙

望廷尉不肯為臣自據淮南亦欲稱帝但恐楚國亡援禍

延林木城門失火殃及池魚橫使漢江一作士子荆揚人

物死亡矢石之下支一作折露霧之中彼梁王操行無聞

輕險有素工用其短以少為多反覆山淵顛倒冠履射爵

論功盪舟稱力年既老矣耄又及之政荒民流禮崩樂壞

改換朝章變易官品雖世異漢朝而事同新室加以用捨

乖方立廢失所矯情動眾飾智驚愚毒蟲滿懷安敢試業

四字係別本改

文苑英華

躁競盈貫茸謬治情內恣鳴靡外逞殘賊人人厭苦家家  
思亂災異降於上怨讟興於下履霜有漸堅冰且至恃浮

一作陰將躁之風俗任輕薄之子孫朋黨路開兵權在外必將

禍生骨肉難起腹心強弩衝城長戟指闕徒探雀鷺無救

府藏之虛空伺一作請熊蹯詎延晷刻之命外崩中潰今實

其時鷓蚌相危一作扼持我乘其弊方使高旗舒旆長轂啓行

迅騎追風精甲耀日四七並列百萬為羣風飄雲動星羅

海運以此赴敵何敵不摧以此攻城何城不陷猶為岸上

之虎當作水中之龍以轉石之形為破竹之勢將使鍾山

渡江青蓋入洛荆棘生建業之宮麋鹿遊姑蘇之館但恐

輿一作車之所轡轆劍騎之所蹈踐杞一作梓於焉傾折

竹箭以此摧殘若吳之王孫蜀之公子順時以動見機而

作面縛銜壁肉祖一作祖率羊歸歎軍門委命下吏當使焚觀而

出拂席相待必以楚材將為晉用固乃喜得異度實自利

獲士衡士龍即援客卿之族將加驃騎之號斯蓋壯士封

侯之日丈夫立節之秋冬冰可折時不再來先事預懷有

如皎日王侯無種工拙在人凡百君子勉求多福若不改

迷坐待淪沒一旦暴骨草莽流血成川猶且不悟噬臍何

及故宣往意馳此簡書檄之到彼咸共申省一作藝文類聚

此檄與藝文類聚資治通鑑所載並同惟魏書島夷

蕭竹傳文既諄復先後亦異今併錄之其僅同者白

字是也

夫乾坤交泰明聖興作有冥運行之力俱盡變化之途抱  
識含靈融然並至呈形賦命混而同往所以玄功潛運至  
德旁通百姓日用而不知萬國受賜而無迹豈徒鑿其耳  
目易其心慮悟以風雲一其文軌使夫日月之照不私兩  
露之施均洽運諸仁壽之域納於福祿之林自晉政多僻  
金行淪蕩中原作戰鬪之場生民爲鳥獸之餌則我皇魏  
握玄帝之圖納水靈之祉駕雲車而自北策龍御以圖南  
政符上帝援溺下土恠物殛死淫水不作運神器於顧盼  
定寶命於踟躕恢之以武功振之以文德宇內反可封之  
俗圓首識堯舜之心沙海荒忽之外瀚漠羈縻之表方志  
所不傳荒經所不綴莫不繩谷鈞山依風託水共仰中國  
之聖同欣大道之行唯夫三吳百越獨阻聲教匪民之弊  
實有由焉自僞晉之後劉蕭作慝僭擅一隅號令自己惟  
我祖宗馭宇愛民重戰未極謀臣之畫不窮節將之兵聊  
遣行人降以尺一圓臺已築黃屋輒去賜其几杖置之度  
外蕭衍輕險有素士操篋聞睥睨君親自少而長好亂樂  
禍惡直醜正巧用其短以少爲多詿惑愚淺大言以驚俗  
驅扇邪僻口兵以作威曲體脅肩搥唇鼓舌候當朝之顧  
指邀在位之餘論遂汗辱冠帶偷竊藩維及寶卷昏狂下  
不堪命曾無北面有犯之節遽滅人倫在三之禮憑妖假  
恠鬼語神言稱兵指闕傾朝鳩主陵虐孤寡聾愚士民天  
不悔禍姦醜得志內恣雕靡外逞殘賊驅羸國之兵逼

口之衆南出五嶺北防九江屯戍不鮮役無寧歲死亡矢  
刃之下夭折露霧之中哭泣者無已傷痍者不絕託身人  
上忽下如草遂使頑嚚子弟肆行姪虐狡猾羣小縱極貪  
恣剝割蒼生肌肉略盡剝剔黔首骨髓俱罄猛虎未方其  
害餓狼詎伴其禍慄慄周餘救死無地至於矯情飾詐事  
非一緒毒螫滿懷妄敦戒業噪競盈膏謬治清靜至乃大  
興寺塔廣繕臺堂昭陽倒景垂珠銜璧崢嶸刻削千門萬  
戶鞭撻疲民盡其筋骨延壤運石悲歌掩途死而可祈其  
同仙化智淺謀疎曾不自揆過桐栢之流翻爲已害子亡  
齊之胤忽爲戎首書契迄茲罕聞其事至於廢捐冢嫡崇  
翻愚子朋黨路開彼我側目疾視扼腕十室而九翹是有

神良亦多人二紀於茲王家多故始則車馳之警終有驚  
墜之哀神祇痛憤寓縣崩震於是故相國齊獻武高王感  
天壤之慘黷激雲雷以慨然伏高義而率民奮大節以成  
務爰有匡國定霸之圖非直討賊雪耻之舉於是睿畧紛  
紜靈武冠世盪滌逋孽尊主康邦皇上秉歷受圖天臨日  
鏡道隨玄運德與神行旣而元首懷舞戚之風上宰薄兵  
車之會遂解繫南冠喻以好睦舟車遵遡川陸光華亭微  
相望欣然自泰反肉還童不待羊陸雖嘉謀長筭爰自我  
始罷戰息民兩獲其泰王者之信明如四時豈或爲人君  
父二三其德書而不法可不惜哉侯景一介役夫出自凡  
賤身名淪蔽無或可紀直以趨馳便習見愛爾朱小人叨

竊遂忝名位及中興之際義旗四指元惡不赦實在羣胡  
景荷人成拔藉其股肱主人有丹頸之期所天陷族滅之  
釁雖不能蔽捍左右以命酬恩猶當慘顏後至義形於色  
而趣利改圖速如覆手投身麾下其爲僕隸獻武王側棄  
其瑕穢錄其小誠得廁五命之末預在一墜之後參跡驅  
馳庶其來効長鞭利鍛術以制之旣關隴逋誅每事經略  
以河南虛空之地非兵戰之衝薄存犄角聊示旗鼓豈資  
實効寄以遊聲軍機催勒蓋惟景任揔兵統旅別有司存  
而愚福有積憍愎遂甚犯違軍紀仍自徇貳禍心潛構翻  
爲亂階負恩棄德罔恤天討不義不昵厚而必顛委慈母  
如脫屣棄少弟如遺土羣子陸陸妻姪成行慕姜兒之爽  
言箴伯春之宛轉跳梁猖獗夫欲誰欺比之梟獍異類同  
醜欲擬蛇鼠顧非其倫及遠託關右委命寇逆寶炬定君  
臣之分黑纓結兄弟之親授以名器之尊救其重圍之死  
憑人擊擊援假人鼻息我而忘恩背惠親尋干戈釁暴惡盈  
側首無託以金陵逋逃之藪江南流禦之地其辭卑體進  
熟圖身詭言浮說抑可知矣叛豎救命豈將擇音僞朝大  
夫幸災忘義主耄於上臣蔽於下逐雀去草曾不是圖竊  
寶叛邑椒蘭比好人而無禮其能國乎夫安危有大勢成  
敗有恒兆不假離朱之目不藉子野之聽聊陳刺心之說  
且吐代謀之言今帝道休明皇猷允塞四民樂業百靈効  
祉雖上相云亡而伊陟繼事秉文經武虎視龍驤驅日下

之俊雄收一世之英銳擊刺猶雷電合戰如風雨控弦躍  
馬固敵足求蠕蠕昔遭離亂輻分瓦裂匹馬孤征告困於  
我國家深敦隣附愍其入懷盡憂人之禮極繼絕之義保  
衛出於故地資給唯其多少存其已亡之業成其莫大之  
基深仁厚德鏤其骨髓引領思報義如手足吐谷渾深執  
忠孝膠漆不渝萬里仰德奏款屬路並申以婚好行禮如  
歸蠕蠕境斜界黃河望通幽夏飛雪千里魯水洞積北風  
轉勁實筋骨之時互寒方猛正纜裘之利吐谷渾疾彼凶  
逆疆兵歲舉傾河及鄯塵通隴峽驅龍池之種藉常勝之  
氣二方候隙企其移種加以獨孤如願擁衆秦中治兵劫  
脅黑獺北備西擬內營腹心救首救尾疲於奔命豈暇爾  
兵東指岷出師函谷且秋風揚塵國有恆防關河形勝之際  
山川襟帶之所猛將精兵基峙岳立又寶炬河音之北黑  
獺北史作芒山魏書作亡之走衆無一旅僅以身歸就其不顧根  
本輕懷進趣斯則一勞未逸天贊我也言之旦旦日月經  
天舉世所知義非徒語持此量之理有可見則侯景遊辭  
莫非虛誕夫景繩樞席牖之子阡陌鄙俚之夫遭風塵之  
會逢馳鷲之日遂位在三吏邑啓千社揣身量分久當止  
足而乃周章去就離跂不已夫豈徒爾事可摧揚度其髮  
叛親離守死不暇乃聞將棄懸瓠遠赴彭城老賊姦謀復  
將作矣固揚聲赴助計在圖襲吞淵明之衆招厭虐之民  
舉長淮以爲斷仍鴟張歲月南面假名死而有已此蓋蜂

鷓鴣之禍我承其弊且僞主昏悖不惟善隣賊忍之心老而彌篤納逋叛之詭譎茂信義以倡狂天喪其神人重其怨將踐瓜圃之蹤且追兇侯之轍今徵發犬羊侵軼徐部築壘擁川覬覦小利此而可忍孰不可懷兵凶戰危出不得已謬奉朝規肅茲九伐扛鼎拔樹之衆超乘投石之旅練甲爭途波聚霧合虎班龍文之逸蘭池蒲梢之駟噓天陸野躡影追風振旅南轅長驅討賊非直三吳鼠面一麾魚駭乘此而往青蓋將歸且衍虐網蚩兵權在外持險躁之風俗兼輕薄之子孫蕭綸兇狡之魁豈無商臣之恨蕭譽矢志之憤當召專諸之客外崩中潰今也其時幕府師行以禮兵動以義弔民伐罪理有存焉其有知機審變翻然騰起立功立事去危就安賞典未忘事必加等若軍威所至敢有拒違尺兇已上咸從梟戮今三禮四義之將豹虎熊羆之士深禦逋僞信納叛亡違卜悞諫實興伐役莫不含怒作色如赴私讐茹肝涉血義不旋踵攻戰之日事若有神莽積麻亂匪旦伊夕以彼曲師危卒望我軍鋒何異蝘蝓披甲蚍蜉舉尾正恐旗鼓一接芝藿俱摧先事喻懷備知翰墨王侯無種禍福由人斯蓋丈夫肉食之秋壯士封侯之會冬冰可折時不再來凡百君子勉求多福檄之所到咸共申省知我國行師之意

爲行軍元帥鄖國公韋孝寬檄陳文

周宣帝大象元年

僞陳私署公卿將校州鎮郡縣村屯邑落蓋聞五精上列

耀魄惣其威靈萬國下分皇王攝其區域至其創業垂統  
革命受終奄有神州光宅函夏莫不垂極襲聖積德累仁  
播厚利於人民建大功於天地然後幽明贊叶兆庶歸往  
瑞之以龍圖鳳紀崇之以玉璽黃屋故能照臨九縣對越  
兩儀永保鴻名長爲稱首未有蠻陬夷落裔土荒隅崛起  
阡陌之中妄竊帝王之號斯則僭越之首縣一作懸同於漢闕  
亡吳之主會於晉臣布在方冊可以龜鏡者也我太祖文  
武皇帝自天攸縱膺運挺生屈道藩條或躍伊始屬玄運  
將改祿去王室三川已震九鼎將飛事功在泥淖疑作深  
流彘乃推誠仗義援手濡足迎衛乘輿崇建旒社舉天經  
於將墜振一作正地軸於已傾血氣食毛咸受其賜是則我

有大造於區夏也重以闢土服遠包荆卷蜀功高於九合  
業重於三分愈執忠貞之操終以人臣之禮至哉大矣無  
得稱焉旣而謳歌允屬金石變響神器大寶用集我有周  
我閔皇帝乃上膺靈命俯順樂推揖讓而登皇極垂衣而  
歸撫運世宗續統克隆洪緒武功文德騰茂飛英我高祖  
武皇帝以上聖降下武以至道弘丕業其寂也象繫不能  
究其微其動也雷霆不能比其變僞齊竊據中原綿歷世  
祀一作紀帶之以巨海長淮鎮之以峻岱崇岳其地廣其民  
衆其俗富其兵強而帝遷明德人思睿后金鉞一麾廓然  
大定申弔伐之義答億兆之心陟方之駕雖遠鼎湖之神  
未絕天元皇帝負四聖之休烈協千載之昌期懸金鏡振



玉鼓宏天綱廣地絡東窮海外西極河源叩管夜郎之所  
 冒頓呼韓之類莫不屈膝稽顙泛水梯山被華夏之仁風  
 仰中國之聖道唯彼揚越獨為匪民最敢黃魚鳥之郡晏安  
 龜蛇之冗故偽魁陳霸先火耕水耨之夫華門圭竇之子  
 無行檢於鄉曲充部隸於藩侯施彼呼船之伎展其盜裘  
 之用值蕭氏喪亂金陵擾攘爛羊啓邑拔卒為將遂得洗  
 濯江漢奮迅泥滓王僧辯秉文經武挹義懷仁志在鷹揚  
 誠深鶴立掃江表之巨寇復梁室之宗社提挈霸先成其  
 羽翼而背恩忘德毀器折枝密相奄襲忍加屠害節士為  
 之扼腕名臣所以流涕蕭方智世有江外實主梁祀霸先  
 義則臣民任惟輔佐御下暴於戾虎輕上踰於老年類作

左傳苞此禍心遽行篡弒遂令羣盜歛起宮闈窘逼梁棟之

間顛死一作斃鋒鏑之下既甚南宮絕宋公之脰又過淖齒

縮齊閔之筋自古逆子亂臣窮兇極悖未有如斯者昌實

霸嗣舊加篡戮殘虐相襲報復循環陳項獲自儲宮我之

俘隸先朝深弘寬宥免其釁鼓置之夷邸淹歷歲時芻豢

費上林之牧廩卹索長安之米其兄舊發常山之念屢致

誠請國務孤首之感以禮遣送項稟性克器不義不昵害

厥猶子僭其偽位朝廷遠撫長駕含垢匿瑕遍省不虧輜

軒繼路東夏克平威震淮海乘勝席卷咸請南轅高祖以

得原失信義有不取一作敢懷遠字小理存久大而遠盟背

惠忽從茲始搖蕩我邊陲侵軼我彭泗我是以有呂梁之

役麾下裴忌程文秀之輩李緒蔣元舉之徒束手軍前不可勝計積甲等孤桐之岫溺卒斷浮聲之流項長惡愈甚守迷不變據如掌之地延翹足之頭猶恐臂當轍舉尾支山習黃旗之謬談志青蓋之妖說貫盈數盡今實其時加庚子應年金火入斗天道人事宛若合符混一之期昭然可見寡人不武董茲戎律內稟惟幄出制天淵部勒諸將雷奔電擊大將軍龍門公拓拔王述領巴蜀之兵壹拾貳萬出於白帝水陸俱下大將軍安昌公拓拔則領驍騎五萬濟於南岸循江東轉梁王舉一國之師盡舳艫之盛發自江陵首尾不絕行軍揔管上柱國杞國公亮率步騎一十五萬掃蕩山林自東闕行軍揔管上柱國邲國公士彥領人馬一十萬濟自泗口徑取廣陵幕府精銳二十萬餘長驅淮水直指江左並同集石首大會金陵凡此諸軍皆從汧隴驍雄幽并勇俠揆犀拔象之夫斬蛟挈兕之士上谷漁陽之騎追風嘯雲荆門鄧塞之舟浮江沿漢象弭飾堂谿之材鷲羽加淇園之竹旌旗麾電戈劍竟野鼓怒則江湖盪沸叱咤則山嶽簸跳以此攻城何城不陷以此衆戰誰能抗禦將恐程門賈霜梧楸與樗櫟同凋崑山火燎天球共瓊玖俱盡故示以禍福冀相全濟陳項若識機知變輿觀轅門當增安樂之封有加歸命之禮僞公卿以下或中華之冠帶流寓江淮或東南之雋楚世載名位豈安危亂之邦事夷裔之主良由身居僞網迹淪寇地雖心存

魏闕無由自拔故耳今正丈夫轉禍一作福之秋君子見機之日若能投誠進款展効立功富貴榮華義同俯拾如有不達機運敢拒王師軍有嚴科刑茲罔赦檄之所到咸共申省

爲北齊檄陳文

盧思道

告三江之表僞署君臣將帥州郡邑落士民等蓋聞上玄垂象列宿拱辰極之忠厚載成形百谷指滄溟之大是以三五以降哲王獻后遠覃聲教大輝威靈日月之所照臨俱荷亭育舟車之所通泊咸附象鞅我大齊積德累功開物成務光宅寰海覆幬蒸民虞夏受終顧有慙德湯武革命未云盡善滄波已東九譯請吏玉門之右萬里無塵諸

華冠帶之俗肆勤南畝皮服引弓之渠頓顙北闕內外得福區宇懾然皇上垂拱巖廊司契而已惟夫太伯之後實號勾吳少康之裔是爲干越江界湫湄如掌之陋塗泥所集瘴癘自興自昔皇王列壤班瑞春秋之義爵不過子在晉永嘉運北數極司馬獻衆無一旅播越江濱劉蕭已還多歷世祀魏氏奄一神州置之度外且西吞巴蜀北據淮淝善人君子可以爲國陳霸先下愚小醜品極輿隸屬揚部淪胥之日幸梁人殲敗之秋騁其姦回妄自尊大蠻觸之戰爭似鱗鯢之跳躍曇項昏頑賊忍不義不慈剽厥猶子竊其僞位蜂蠆非毒谿壑易滿事甚楚圍之纓理切吳光之劔國小地狹虐用其民坑戮侔於屠伯芟夷過於薙

氏加以沉迷翹葉酣醕終朝澆灌取盡夜以繼晷貨賄公  
 行政刑不立踈棄良士狎近小人守宰蠶漁子弟荒暴頭  
 會箕歛杼軸其空災異相仍稻蟹不熟江左黎獻戴目而  
 視齊之季世實多涼德江淮之間斃為頃有便謂三春易  
 求百年可致達卜悞諫黷武窮兵吳明徹程文秀之徒並  
 早經行陣粗有風力彼朝上下繫以存立呂梁之後貫盈  
 惡稔魯未交綏雲卷霧徹組練塞垣觥觥噎水顧眄之頃  
 隻輪不歸及周宣馭曆將一淮海荆舒之民奢侈為怨聊  
 命偏裨拯其荼毒長江已北若火焚毛是則楊越之地為  
 陳孤立卒弊壞蹙邦羸政塞乘奔無轡譬茲非險坐新  
 待燃方此為泰司馬消難切疑荷特私任居連率猜狂使

酒竊地外犇曇項背恩棄德是信是使引盜納姦無媿無  
 畏天奪其魄憑犯不悛緣邊諸城犬羊荐食聖主以軒開  
 萬國屬盡九州一隅不庭宜置天討爰詔六軍分間受鉞  
 西徵秦隴之銳北引燕代之英五校雄兒超乘俱起三河  
 猛士援距爭奮虎夫萬隊豹騎千羣並骨勇肉飛風驟霧  
 合憬彼江黃之衆過矣彭濮之民巨艦高鱸順流東指江  
 都壽春之域扼喉撫背之兵飛龍赤馬絕水南越漢后昆  
 明未足方其訓旅魏王玄武不能比其隸師以江湖之泥  
 短衣祝髮輕舳利舸便習者多陳上迷天意下憑地險所  
 以舉尾支山怒臂當轅一作今荆門銳卒一作致命前驅  
 淮南義師賈勇競入揚舲振解疑兔走鳧飛然則彼之所

長我亦兼有我利涉大川匪旦伊夕江郢運遭吳會裔旅  
東西遏絕通致無由偽朝軍旅或陳誠款密使相尋最爾  
危邦表裏携貳兼弱攻昧今也其時扛鼎蒙輪之卒事均  
驅兇三禮四義之將晚疑作晚視韓白正正之旗百道俱進  
並雲移雷動大會金陵牙旂暗一作山原金鼓沸天地呼  
吸則江漢迴流叱咤則衡疑可拔運岱山而壓春郊引渤  
海而濯秋螢當不足等其銷滅譬其糞粉猥以不武謬摠  
戎律上稟廟堂之謀下資素飽之氣使張悌之魂先遊一作  
逝北斗呂嘉之級遠至新鄉漂櫓溺驂孱然已至亂麻積  
莽可為寒心僞主若天誘其誠去危轉禍審青蓋之欲歸  
知蔣山之應渡銜璧輿觀拜手轅門則上比吳蜀之君不  
失公侯之寵陳之百辟鄉士編戶黔庶有能深識適順因  
事立功亦當服冕乘軒紆青佩紫疏爵酬庸待以不次王  
者之師全救為本萬姓毫釐靡所侵軼勉求多福無待噬  
臍檄之所到咸兵申省

低一格

此檄述吳明徹及司馬消難事以史考之明徹  
呂梁之敗在周宣政元年元一年周已滅齊後  
二年消難方奔陳又明年周禪隋開皇元年代  
陳文華既題作北齊又文有我大齊之語未詳  
其誤今兩齊字疑皆為隋當考

為侯莫陳悅檄陳蕭摩訶等文

案侯莫陳悅西魏末熙三年卒後隋代陳以  
侯莫陳穎為行軍總管悅當作穎

天文軌未同江湖致阻風雲密邇良用依然肇歲猶寒想  
 如宜也經始戎務念以勞懷寡人肅稟天策爰征不庭懸  
 旌秣馬今次楓岸夫時有盛衰運有興滅積德必慶延後  
 嗣長惡則祚不及遠陳氏往因際會竊有金陵藉項承立  
 遽相屠害叔寶嗣偽彌復忍虐沉醜日增內荒愈甚雕牆  
 峻宇加錦綉於土木嚴刑酷法陷人物於塗炭諫士喪身  
 元良鉗口無道之極自古罕聞有一於此何可不滅斯皆  
 公等所悉素匪寓言我皇誕膺靈命光臨大寶再闢乾坤  
 重懸日月歷代逋誅之寇曠古不羈之民感我仁風咸沐  
 至道唯彼吳越猶未革心主上義存字小含以寬大冀能  
 撫育彼民守其封域而窮兇極暴日就月將士庶無聊人  
 神共憤乞師繼軌獻款相尋愍彼黎元實與我後已有別  
 詔止廢偽主之身此外士民咸從蕩蕩西自巫峽東達滄  
 海巨艦覆波濤樓船出雲霧爪步六合當心腹之衝渚宮  
 漢口據上游之勢曲江鎮揚據其要津鐵馬价夫千羣萬  
 隊攘袂扼腕唯所用之彼國兵士多少備見以寡御衆理  
 在非敵救首救尾將何以及况復士無鬪心人懷二志身  
 雖擐甲情在倒戈假使穰苴更生孫武猶在亦不能施其  
 智畧况異昔日者乎往者呂梁之師一舉殲滅淮南之地  
 二旬悉平彼之將帥皆奔走之餘何可用也世疑公早涉  
 戎旅備經征行安危之勢如近目前得喪之機若觀掌內  
 以國家今日之盛偽主若猶可全為其展効容復可爾江

一作  
及非

東難立有識同知陳氏必亡賢愚共見天之所廢誰能興  
之既無所成徒自傾覆夫毒蛇螫手壯士斷腕豈不惜其  
肌骨所存者大也公若轉禍爲福因機立功翻然奮飛共  
弘大業則江東士衆免於鋒刃之苦天下生民欣然太平  
之世公當位極台鼎福延子孫爰及宗族咸加榮寵豈與  
夫不識天命拒我王師舉死扶傷履涉膏血同年共日而  
語哉斯皆肝膈至言成敗大理幸非可惑宜早圖之

隋檄陳尚書江惣等文

南北雖殊風雲在望載懷虛遲寤寐爲勞獻歲猶寒比當  
清豫匡贊乎國良亦慤慤寡人忝膺朝寄董律專征跋涉  
山川今次江際公等文儒自立器用適時冠蓋二世齒德  
兼重孔老殊教名墨異家金匱朱韜銀編玉策莫不騰於  
舌抄散在筆端邃古成敗之機近代安危之跡照同懸鏡  
明若觀火無待指南自應神悟猶恐思之未審差以毫釐  
聊煩翰墨略申梗槩自穹昊生民樹之司牧義軒以降書  
契可紀咸一姓承立五帝四海無兩帝漢道云季三方鼎立時  
惟版蕩世匪休明塗炭起而蜀亡典午興而吳滅永嘉喪  
亂紫宸曠主劉石符姚之儔僞夏僭燕之醜妄塵大寶事  
乖圖錄魏室乘時兆基朔野經始嵩洛未暇江湖有周受  
命敵非齊氏務在兼并不遑外畧蕞爾吳越自相君長竊  
擬王者之儀妄談天子之氣偷安假息綿歷世祀我大隋  
之肇開寶祚光有神州皇帝感曜魄之靈應太微之座千

年啓聖萬代一時深仁至德寧濟羣品越海窮河東漸西  
 被旄頭之屬歷代之勦作我臣民匍匐服裳唯彼江表獨  
 隔皇風夫物極則反否終斯泰郭璞有云年經三百天下  
 大同茲實玄運已定於前聖主膺期而出欲以區區之陳  
 國違上天之冥數其不可存者一也大必包小天地之常  
 規明能通暗日月之常理論道德以唐陶而征有苗語衆  
 寡舉海內而當羣小在長江舟楫之用矜其積習而山川  
 共有我據上游鼓棹之能吳楚不異高鱸巨舫東西萬里  
 扼喉撫背水陸千途彼之兵士不過十萬首尾分布所在  
 危急加以屯戍邊方淹積歲序風雨以爲櫛沐蟻虱生於  
 甲冑望我寬仁思倒戈戟通在戎行更成敵國守以時

則魚爛土崩接以鋒刃則鳥驚鹿走理在必然不假枚卜  
 此不可存者二也豐侯好酒實喪厥邦梁伯役民潰其宗  
 社彼之僞主覆車是襲日夜沉湎曾無節度繕造宮室莫  
 知窮已竭四民之產荒縱其心歛百姓之哀以爲已樂寶  
 衣玉食填積後宮短褐麤餼不充編戶一芥之善蔑爾無  
 聞五子之歌宛然悉備雖欲勿喪其可得乎此不可存者  
 三也僞主忌能護短酷法淫刑骨骸之臣盡見踈斥諫諍  
 之士皆被屠害遐邇結舌衣冠解體人妖鬼怪觸類呈災  
 稚齒耆年咸知殘滅此不可存者四也以此小邦攝於大  
 國邊烽夜動照彼都城戍鼓晨嚴震其宮殿累基十二方  
 此未危懸縷千鈞比斯非切而莫知憂恐更自驕矜曾無



事大之心專行犯上之志侵軼我邊鄙招納我叛亡國家  
 爰自受命每從含養敦以隣睦申其聘好冀能守彼宗枋  
 靜其疆域而長惡益甚縱毒彌深吳會雄稜之人湘郢耿  
 介之士乞師請命盈庭滿闕帝乃憫然矜彼黎獻授鉞推  
 轂弔民伐罪已有別詔唯廢僞主之身自餘士庶普從肆  
 責向所陳說咸是格言非曰游談共相欺誤且劉叔疑納  
 譙周之計而獲存孫皓用薛瑩之詞而致福此二子者終  
 有良臣之譽皆無陷君之譏何則所耻者小所存者大若  
 憲章往彥聿遵前軌則僞主享封侯之業祖彌延血食之  
 期江東士民實受其賜公等身保榮貴名垂竹帛豈不美  
 歟若膠柱不移守迷莫變率其蟻衆一作聚敢拒王師軍有  
 刑悔無及矣禍成俄頃宜早圖之使人今還遲有委曲  
 言不盡意豈復多云揚廣白

文苑英華卷第六百四十五

文苑英華卷第六百四十五

校三百三十七字

十月三十日

